

周

禮

正

義

周禮正義卷十二

瑞安孫詒讓學

玉府掌王之金玉玩好兵器凡良貨賄之藏良善也此物皆式貢之餘財所作其不良又有受而藏之者疏掌王之金玉玩好兵器凡良貨賄之藏者兵謂五兵器謂車旃用器卽內府良兵良器是也此經司兵及它職云五兵兵甲兵革者皆單言兵不繁器爲文大司馬云軍器則又不言兵凡云兵器者並兵與器爲二鄭賈多釋爲軍器則與內府不合非也大宰注云金玉曰貨布帛曰賄則金玉玩好兵器亦良貨賄之種別此金玉玩好兵器及良貨賄卽大宰九賦之稅所造及九職之功所貢者故遂師云入野職野賦于玉府明此官爲其受藏之府內府亦掌

良貨賄此官蓋掌其尤良中王之服御者亦與彼爲官聯也易
藏云獸人曰皮毛筋骨入于王府藏人曰凡獻征入于王府摩
人曰斂其皮角筋骨入于王府澤虞曰掌國澤之政令守其財
物以時入之于王府職金亦曰入其金錫于爲兵器之府入其
金石丹青于守藏之府此其玩好兵器良貨賄之物玉府皆掌
而藏之矣 注云良善也者宰夫注義同云此物皆式貢之餘
財所作者賈疏云案上大府云式貢之餘財以供玩好之用彼
玩好之中兼有金玉兵器故知式貢餘財也云其不良又有受
而藏之者者賈疏云卽上大府云受藏受用之府是也詒讓案
以經云良貨賄明惟良者乃入此官其不良者仍入內外府諸
官也共王之服玉佩玉珠玉佩玉者王之所帶者玉藻曰君子

於玉比德焉天子佩白玉而玄組綬詩傳曰佩玉上有蔥衡下有雙璜衡牙孃珠以納其間鄭司農云服玉冠飾十二玉疏其王之服玉佩玉珠玉者此皆王服御之玉也江永云有法度之玉典瑞掌之良貨賄之玉玉府藏之服玉佩玉珠玉食玉含玉皆良貨賄之玉也詒讓案說文玉部云珠蚌中陰精也此珠玉則當是小玉圓好如珠者或亦琢玉爲之非蚌珠也爾雅釋地云南方之美者有霍山之多珠玉焉彼珠卽小玉也荀子賦篇云旋玉瑤珠不知佩也則古珠或以瑤爲之毛詩衛風木瓜傳云瓊瑤美石玉石散文亦通注云佩玉者王之所帶者者說文人部云佩大帶佩也釋名釋衣服云佩倍也言其非一物有倍貳也有珠有玉有容刀有帨巾有簪之屬也案容刀諸物所

謂事佩也與玉佩異賈疏云謂佩於革帶之上者也引玉藻曰君子於玉比德焉者彼下文卽說天子以下佩玉事故引以證王必佩玉之義聘義文亦略同云天子佩白玉而玄組纓者亦玉藻文鄭彼注云纓者所以貫佩玉相承受者也賈疏云所佩白玉謂衡璜琬琰玄組纓者用玄組條穿連衡璜等使相承受引詩傳者賈疏謂是韓詩案月令孔疏引韓詩外傳文與此同然今本外傳無此語疑出韓詩內傳也國語晉語韋注引詩傳及大戴禮記保傅篇賈子容經說佩玉並略同云佩玉上有葱衡者大戴禮保傅盧注云衡平也賈疏云衡橫也謂葱玉爲橫梁案說文玉部云珩佩上玉也所以節行止也衡卽珩之段字徐堅初學記器物部引三禮圖云衡長五寸博三寸上平爲衡

案鉉覽及聶氏三禮圖引並作博一寸疑徐引非是玉藻云一
命再命幽衡三命慈衡注云衡佩玉之衡也青謂之慈又云天
子佩白玉公侯佩山立玉大夫佩水蒼玉世子佩瑜玉士佩瑤
玖則天子以下佩玉各異所謂慈衡者卽大夫佩水蒼玉之衡
此鄭引詩傳成語故仍其舊文不復改易實則天子當佩白玉
衡不佩慈衡國語晉語云白玉之珩六雙楚語亦云楚之白珩
蓋卽天子所佩白玉衡也又詩傳云上有慈衡賈孔疏義並謂
佩上止有一衡而宋本大戴禮及賈子月令章句三禮舊圖漢
書五行志注並云上有雙衡初學記器物部引魚豢魏略亦云
有雙珩雙珩珩珩珩牙珩珠爲佩者乃漢明帝采古文始制也
任大椿云攷衡之爲義惟一梁上橫追師之衡轉人之衡與佩

上之衡名義相似蓋以一衡爲上端下屬三組中組以貫珣衡牙旁組以貫兩珣及雙璜也若有兩衡何以貫三組乎況三禮舊圖明云衡長五寸若雙衡則一尺矣似繫身旁而容一尺之衡其不適於體甚明故雙之作蕙當以韓詩爲正案任說甚蕙孔廣森亦據儀禮經傳通解校改保傳雙衡爲蕙衡但據玉藻則天子以下佩衡玉色各異大戴禮諸書並通說佩制與詩說不同不宜槩沿三命蕙衡之文陳奐黃以周並從舊本大戴禮作雙衡陳氏云珣爲佩玉最上之名行步下則雙璜與衡牙成聲上則珣與珣成聲采芑篇有琫蕙珣傳琫珣聲謂卽雙珣之聲也鄭引詩傳者三家釋采芑之蕙珣後儒因改大戴禮雙字爲蕙字天子白珣大戴言天子之珣不得爲蕙珣明矣案依陳

說則韓偓詩自作憑衡賦記述禮又自作雙衡兩文不可強
合其論實尤當晉語說白珩以雙計亦足爲保傳佐證但任謂
衡之義取一梁上橫與車衡義同其說則固不誤蓋祿鳳之玉
不一今以條組交午貫穿若非以一衡總攝兩端則縣之華帶
必有散亂之弊豈亦安能成節乎衡之不能與璜同爲平列分
懸揆之物理殆無疑義竊謂古佩玉自有雙衡而實非平列似
當以兩玉重疊縣之其形蓋橫平而上微隆起爲鈍角下微容
邪刻旁出爲岐足故晉語韋注云珩形似珩而小楚語注又云
珩上之橫者韋所謂象珩而上橫者自據漢以後橫縣之珩爲
象然則三禮舊圖云上平曰衡亦對雙璜側垂大較言之實則
衡上隆而下室與橫磬略同固非正平也其縣之則上下重杏

用去齒不逾數分動則下衡之首與上衡恆相摩切故不藉衡牙而自能琤然成聲而三組分貫於上下衡之中與兩旁則與一衡無異自無不能總攝之患揆校文制於禮或有合乎云下有雙琖衡牙者保傳盧注云半璧曰琖玉藻云佩玉有衡牙鄭注云居中央以前後觸也孔疏云凡佩玉必上繫於衡下垂三道穿以蠙珠下端前後以縣於琖中央下端縣以衡牙動則衡牙前後觸琖而爲聲所觸之玉其形似牙故曰衡牙皇氏謂衡居中央牙是外畔兩邊之琖以衡牙爲二物若如皇氏說鄭何得云牙居中央以爲前後觸也賈疏云謂以組懸於衡之兩頭兩組之末皆有半璧曰琖故云雙琖又以一組懸於衡之中央於末著衡牙使前後觸琖故言衡牙案賈說是也依皇侃說則

瑱一名牙衝牙者以衝瑱得名與鄭賈說異保博盧注云衝在
中牙在側說亦與皇同初學記及聶氏三禮圖引舊圖云下有
雙瑱徑三寸衝牙長三寸綜校諸說瑱蓋以徑三寸之瑱而中
析之每瑱肉蓋徑一寸其好半徑則五分也長皆如其全徑衝
牙長三寸橫設瑱開其兩角適切瑱好之中以雙瑱肉各一寸
并衝牙三寸爲五寸與上衝之長適相準此亦衝橫縣之義證
也云瑱珠以納其閒者大戴禮保博云玼珠以納其閒瑱瑱以
雜之盧注云納於衝瑱衝牙之閒玼亦作瑱總曰玼珠而赤者
曰瑱白者曰瑱或曰瑱美玉瑱石次玉書禹貢云淮夷瑱珠孔
疏引鄭注云瑱珠珠名說文玉部云玼珠也宋弘云淮水中出
玼珠玼珠珠之有聲者重文作瑱云夏書玼从虫賈賈疏云瑱

蜂也珠出於蜂故言螭珠納其閒者組繩有五皆穿珠於其閒故云以納其閒案賈蓋謂螭爲蜂之別種因以名其珠卽本鄭義也玉藻疏謂佩組三道皆穿以螭珠賈更及邪繫二組午貫四維故有五組與孔義實同也續漢書輿服志劉注引月令章句云佩上有雙衡下有雙璫璫以維之衡牙螭珠以納其閒初學記器物部引三禮圖文略同又云璫中橫以衡牙以蒼珠爲璫案此並讀衡牙螭珠以納其閒爲句與盧辯及賈孔兩疏異漢書五行志顏注說同蓋衡牙居兩璫之間亦得爲納閒然鄭讀實不如是也依大戴記襍佩又有璫璫毛詩鄘風有女同車傳云佩有璫璫所以納閒此注引詩傳則無璫璫唯有螭珠賈疏又云案毛詩傳衡璫之外別有璫璫其璫璫所置當於懸

衡牙組之中央又以二組穿於琚瑀之內角斜繫於衡之兩頭於組末繫於璜案諸釋賈說似以琚瑀爲一玉且准中組設之與璜珠獨綴五組不同而虛辨及三禮舊圖並謂琚瑀卽珠續漢與服志注引顏延之纂要云琚瑀所以納閒在玉之閒今白珠也似亦以螭珠與琚瑀爲一珠乃玉珠非蚌珠魏略以螭珠爲琚珠說文玉部云琚石之美者則魚說雖不以琚珠琚瑀爲一而亦不以爲蚌珠並與賈義異任大椿云保傅篇先言蔥衡及雙璜衡牙特舉上下兩端也上下玉名旣著於是始言上下之閒貫以玼珠而玼珠之中又閒以琚瑀之玉其云琚瑀以雜之猶云琚瑀以閒之也鄭風佩玉瓊琚毛傳佩有琚瑀所以納閒閒猶中也謂琚瑀納在衡璜衡牙之中也大戴禮注亦謂玼

珠納銜璫之閒不及琚瑀蓋彼注以琚瑀爲玳珠別名非玉也
則佩上下惟有銜璫二玉欲明玳珠在納玉閒惟得云納於銜
璫之閒耳今攷雜佩以贈之傳雜佩者珩璫琚瑀銜牙之類珩
璫銜牙與琚瑀並舉珩璫銜牙旣爲玉則琚瑀亦爲玉明矣故
說文玉篇皆云瑀石之似玉者說文云琚瑀琚玉篇亦云琚玉
也續漢志孝明皇帝乃爲大佩銜牙雙瑀璫皆以白玉然則漢
志明以白玉爲琚瑀則琚瑀不得爲玳珠矣案任謂琚瑀非玳
珠是也賈前疏謂琚瑀以白玉爲之與續漢志同則亦不謂與
蠙珠爲一任說與賈正合琚瑀納閒似五組皆常有之與蠙珠
相錯共處而賈前疏則謂唯中組有之古書所說不詳宋以後
說者皆謂琚在中組雙瑀在旁咸無瑀證今亦無以定之約云

佩玉蓋通衡瑀衡牙及瑀瑀珠言之佩以玉爲主言玉可以
咳百珠也鄭司農云服玉冠飾十二玉者賈疏云案弁師掌五
冕袞冕十二旒鷩冕九旒毳冕七旒絺冕五旒玄冕三旒皆十
二玉冕則冠也弁師又有皮弁韋弁冠亦皆十二玉故云冠飾
十二玉也論讓案弁師又有玉笄玉瑱當亦在服玉之內先鄭
不言者文不具又月令春服蒼玉夏服赤玉中央土服黃玉秋
服白玉冬服玄玉後鄭彼注云凡所服玉謂佩飾及所佩者之
衡瑀也呂氏春秋孟春紀高注則直訓服爲佩彼不言佩玉故
服玉內兼有佩玉此服玉在佩玉之外故先鄭止舉冠飾之玉
爲釋也王齊則共食玉玉是陽精之純者食之以禦水氣鄭司
農云王齊當食玉屑疏注云玉是陽精之純者者賈疏云但玉

聲清清則屬陽又案楚語云王孫圉與趙簡子言曰玉足以庇
蔭嘉穀使無水旱之灾則寶之珠足以禦火則寶之服氏云珠
水精足以禦火如是則玉是火精可知案賈說非也易說卦傳
云乾爲玉故爲陽精白虎通義攷黜篇云王者德美之至也故
爲陽精之純者云食之以禦水氣者大戴禮記勸學篇及管子
侈靡篇並云王者陽之陰也故勝水此謂玉可以禦水氣義蓋
與彼同但齊居路寢何必以禦水氣未審屢指賈疏謂恐起動
多故須玉以禦水氣亦未塢鄭司農云王齊當食玉屑者楚辭
離騷云精瑱靡以爲楳王注云精瑩也靡屑也精瑩玉屑以爲
儲糧是古有食玉屑之法賈疏云其玉屑研之乃可食俞正燮
云太平御覽引吳普本草云玉泉一名玉屑神農岐伯雷公甘

三輔黃圖云武帝銷金玉杯承露和玉屑服之以求仙道皆食玉也惠士奇云食玉掌於玉府而不掌於膳夫則玉非可食之物矣左傳成十七年聲伯夢或填已瓊瑰食之食玉者古象聲伯夢而惡之則玉非可食之物益明曾釗云方書亦有食玉法然非經義也膳夫職云王齊日三舉是齊食加日食二等其器必有用玉者玉藻正義天子朔月太牢當六簋盛舉則八簋禮器注饌簋謂刻而飾之天子以玉然則食玉蓋卽簋歟日食朔食並有蓋玉府獨共王齊者變食亦變器也案先鄭說蓋據漢時神仙服食家言若俞氏所舉是也然其說不經於古未聞殆不足據惠氏糾之甚允通校諸家之說惟曾說較爲近理蓋王齊備盛饌則饌具之器亦宜備飾食玉者殆卽以玉飾食器若

玉敦玉豆之類皆是與大喪共含玉復衣裳角枕角柶角枕以
枕尸鄭司農云復招魂也衣裳生時服招魂復魄于大廟至四
郊角柶角匕也以模齒士喪禮曰模齒用角柶模齒者令可飯
含立謂復於四郊以綏疏大喪共含玉者此與典瑞爲官聯也
賈疏云大喪謂王喪含玉璽形而小以爲口實此不言隨王飯
玉者文不備江永云含玉玉府典瑞兩官並共豈玉府共之於
典瑞而典瑞乃共之以含與案江說近是此大喪疑亦通包王
后世子之喪賈說未核含玉詳大宰疏云復衣裳者與司服爲
官聯也共與夏采祭僕執僕等用之說文巾部云常下幫也重
衣裳常或从衣凡復時所用吉服燕服威襦裳具百故經兼云
衣裳也賈疏云王始死招魂復魄之衣裳不在司服者司服所

掌是尋常衣服王府所掌皆王之美物其衣服美者亦王府掌之但所復衣裳用死者上服故王府供之案賈說非也司服云大喪共其復衣服彼官所掌自裘冕以下弁冠諸禮服無不備共則其美者不宜轉在此官據下經云掌王之燕衣服則此復衣裳疑亦當爲燕衣服王喪復於大小寢或兼用燕服也士冠禮大小斂皆祭服散衣並列彼注釋散衣爲袍繭之屬卽下經燕衣服也若然司服所共者祭服此官所共者殆卽散衣二官互相備與司服又有斂衣服奠衣服廢衣服當亦祭服散衣並有經皆不具也 注云角枕以枕尸者說文木部云枕臥所薦首者詩唐風葛生云角枕粲兮毛傳云齊則角枕蓋枕尸用齊時枕也旣夕記始死云設牀第設枕喪大記沐浴之後云設牀

禮第有枕含一牀襲一牀遷尸於堂又一牀皆有枕席君大夫
士一也彼枕皆卽此角枕鄭司農云復招魂也者夏采先鄭注
云復於始死招魂復魄與此注義同楚辭招魂王敍云招者召
也以手曰招以言曰召魂者身之精也士喪禮說復云北面招
以衣卽謂招魂也檀弓孔疏謂招魂者是六國以來之言未塙
云衣裳生時服者謂王生時常御之服明與明器之衣服異也
云招魂復魄于大廟至四郊者于注例當作於各本並誤此亦
據夏采文先鄭意彼文雖云以乘車載綏復於四郊亦兼有衣
裳矣云至四郊者明自內及外眈祭僕復小廟隸僕復小廄大
寢而言也云角枕角匕也者說文木部云禮有柶柶匕也又匕
部云匕所以比取飯一名柶雅釋器云柶匙匕也士冠禮例

尊一組醴有筐實勺解角柶鄭彼注云柶狀如匕以角爲之者
欲滑也喪大記孔疏云柶以角爲之長六寸兩頭曲屈聶氏三
禮圖云醴有柶用角爲之釧有柶用木爲之舊圖云柶長尺楨
博三寸曲柄長六寸漆赤中及柄端又云疏匕亦形如飯乘以
棘爲之長二尺四寸葉長八寸博三寸其柄葉通疏皆丹漆之
桃匕漆柄末及淺斗中皆朱柄葉長短廣狹與疏匕同案禮凡
扱醴扱羹並以柶蓋與匕飯匕牲體之匕形略同而用異據士
冠禮角柶有枋有葉舊禮圖說匕亦同禮圖之楸卽聘禮之搯
士冠禮之葉鄭注云葉柶大端是也云以楔齒者卽據士喪禮
文彼注云爲將合恐其口閉急也喪大記疏云楔柱也以柶柱
張尸齒令開也引士喪禮曰楔齒用角柶者證角柶楔齒之事

喪大記云小臣楔齒用角柶綴足用燕几君大夫士一也則天子禮亦與士同故鄭引士禮爲證也楔齒必用角柶者蓋以始死不能猝辦喪器因以生時所用之角柶斷去其櫪而用其曲柄故喪大記疏謂角柶長六寸與三禮舊圖角柶四柄之長正合以其楔齒卽謂之楔旣夕記所云楔貌如輓上兩末蓋柶未斷時上端之柄有末而下端則爲櫪上銳下圓止有一末至斷去其櫪則曲柄乃有兩末正與車輓相似但車輓上附於衡下挽牛領兩末必下向此楔齒則兩末上向爲異耳至於角柶曲柄乃其本制非爲楔齒乃屈之也賈疏乃謂如枇杷拔屈中央楔齒則似謂不去其櫪而別屈其中央士喪禮疏亦云此角柶與拔醴角柶制別故屈之如輓蓋謂遇喪時別制此楔齒之角

栖與生時所用形制不同誤也云棲齒者令可飯含者含釋文
作哈案哈卽含之俗詳大宰疏謂始死時柱齒令不閉以待飯
含也云立謂復於四郊以綏者後鄭意復衣裳止用於廟寢也
賈疏云案夏采云以冕服復於太祖以乘車建綏復於四郊言
此者破先鄭於四郊亦以衣服掌王之燕衣服衽席牀第凡褻
器燕衣服者巾絮寢衣袍襚之屬皆良貨賄所成第簀也鄭司
農云衽席單席也褻器清器虎子之屬疏掌王之燕衣服衽席
牀第者賈疏云謂燕寢中所有衣服之屬衽席者亦燕寢中臥
席牀第者謂燕寢中牀簀也注云燕衣服者巾絮寢衣袍襚
之屬言明非燕居上服立端服也賈疏云巾絮者案內則左佩
紛帨紛帨卽巾也又婦事舅姑佩有綵纁此絮則纁也寢衣者

論語鄉黨云必有廢衣長一身有半鄭注云今小臥被是也袍
釋者案毛詩云豈曰無衣與子同袍與子同袍是也王念孫云
絮與帑通帑亦巾也說文帑巾帑也巾帑卽巾絮也方言幘巾
也大巾謂之希嵩嶽之南陳頴之閒謂之帑郭璞音奴豬反漢
書周勃傳太后以冒絮提文帝應劭注曰陌額絮也晉灼曰巴
蜀異物志謂頭上巾爲冒絮說苑正諫篇吳王蒙絮覆面而自
刎謂以巾絮覆面也亦通作挈風俗通義怪神篇以挈巾結兩
足幘冠之是也疏以絮爲纈失之釋文不爲絮字作音蓋誤以
爲絲絮之絮矣案王說是也說文衣部云被廢衣袍襦也釋綺
也玉藻云縵爲繭組爲袍釋爲綈帛爲襦廣雅釋器云釋袍長
襦也釋亦作澤釋名釋衣服云袍丈夫若下至跗者也袍苞也

衾內衣也汗衣近身受汗垢之衣也詩謂之澤受汗澤也秦風
無衣篇與子同澤箋云澤褻衣近汗垢案澤澤字通詩箋襟記
注及論語鄉黨皇疏引鄭注並以袍澤爲褻衣蓋凡著袍繡者
必內著澤次著袍次著中衣次加禮服爲表故賈聘禮疏云凡
服四時不同假令冬有裘假身禪衫又有褊褊褊之上上有裘
裘上有裼衣裼衣之上又有上服皮弁祭服之等若夏則以絺
綌絺綌之上則有中衣中衣之上復有上服若春秋二時則衣
袷袷袷之上加以中衣中衣之上加以上服也案賈說四時
衣法甚嚴此注釋卽襯身禪衫袍卽褊之長者通言之亦得爲
釋故廣雅釋袍並訓長褊而說文又訓褊爲褊也凡中衣以內
之衣通爲褻衣燕居容有不上衣或并不加裼衣中衣若王

後所謂振絺綌表裘者故亦通謂之燕衣服自裘爲司裘所掌
外餘中衣及絺綌禪褶袍繡等此官盡共之矣中衣褐衣互詳
司裘疏云皆良貨賄所成者賈疏云見上文云凡良貨賄之藏
故知此良貨賄所成云第簣也者說文竹部云第牀簣也簣牀
棧也爾雅釋器云簣謂之第郭注云牀版也喪大記注云禮第
祖簣也案第爲牀上竹木之棧亦通謂牀爲第方言云牀齊魯
之間謂之簣陳楚之間或謂之第與此經義小異鄭司農云衽
席單席也者賈疏云案曲禮云請衽何趾鄭注云衽臥席又案
斯干詩云下莞上簟內則云敝枕簞簟席榻器而藏之司農云
單席則臥之簣席案賈說是也曲禮云請席何鄉請衽何趾彼
文以衽爲臥席對席爲坐席言之此經衽席與牀第並舉則衽

席並爲寢臥之席可知士昏禮御衽于奧賡衽長席在東北止是臥席衽衽亦稱席也既夕記云設牀第當牖衽下莞上簟此士禮遣尸之席與生時臥席同禮器孔疏引熊氏云天子臥席則亦下莞上簟詩斯干所云是也詩小雅疏亦謂寢臥之席自天子以下莞簟同依熊孔說則此經衽席卽下莞上簟之臥席也先鄭云單席者禮器云天子之席五重此臥席蓋下鋪莞席五重而上加簟席不重不重卽單席也先鄭意經衽爲親身之簟席席則在下之莞席衽席異物猶內則簟席對文鄭注亦云簟席之親身也若然衽席單席乃專釋衽字因文使連言席猶酒正注澄酒三酒專釋酒字而連言澄也凡禮經同席而案設之謂之重異席則謂之加上席有再加而皆止席席故曰單單

者不重之謂非無加之謂也詳司几筵疏云褻器清器虎子之屬古說文衣部云褻私服引申之凡私褻之用器亦謂之褻器丁晏云史記萬石君傳石建取親中裙廁牘集解呂靜云櫛櫛褻器也音威豆賈逵解因官櫛虎子也櫛行清也孟康曰櫛行清櫛行清中受糞函也東南人謂鑿木空中如曹謂之櫛鄭云清器猶行清也義本賈君說文廁清也唐雅圖廁也清圖古今字案丁說是也賈景伯蓋以櫛櫛詰此褻器而申釋其義急就篇云屏廁清濯糞土壤顏注云清言其處特異餘所常當加潔清也釋名釋宮室云廁或曰圖言至穢之處宜常脩治使潔清也蓋漢時名廁爲清故謂受糞之器爲清器清器卽行清謂以木爲函可移徙者通謂之廁與宮人之廛爲地廁別虎子盛溺

器亦漢時俗語後漢書獻帝紀李注引漢官儀云侍中分掌乘
輿服物下至褻器虎子之屬西京雜記云漢朝以玉爲虎子以
爲便器使侍中執之行幸以從是也說文木部云櫜械衛褻器
也與買鄭義同賈疏云案內豎及葬執褻器以從遣車彼褻器
振飾類沐之器與此注不同彼從葬於死者不用清器故爲類
沐之器若合諸侯則其珠槃玉敦敦槃類珠玉以爲飾古者以
槃盛血以敦盛食合諸侯者必割牛耳取其血歃之以盟珠槃
以盛牛耳尸盟者執之故書珠爲夷鄭司農云夷槃或爲珠槃
玉敦歃血玉器疏若合諸侯者謂時見曰會殷見曰同司盟云
凡邦國有疑會同則掌其盟約之載及其禮儀是也其十二年
巡守殷國亦有盟法左昭十三年傳晉叔向曰明王之制使諸

侯歲聘以志業開朝以講禮再朝而會以示威再會而盟以顯昭明杜注云十二年王巡守盟于方嶽之下彼聘朝會年數雖不與此經同而十二年巡守則一足爲巡守有盟之證四者之盟封人所謂大盟也云則其珠槃玉敦者王大盟此官共槃敦以盛牛耳及血其諸侯自相與盟非王府所共也共之者奉其器以授司盟及戎右三官相與爲官聯也故畢則又受而藏之注云敦槃類者廣雅釋器云盤盂也盃敦字同詩簡風猷孔疏引孫炎爾雅注云敦器似盂士喪禮云黍稷用瓦敦有蓋又啟會面足注云敦有足則敦之形如今酒敦少半饋食禮云主婦自東房執一金敦黍有蓋又云敦皆南首注云敦有首者尊者器飾也飾蓋象龜形賈氏彼疏引孝經鉞命決云敦規首上

下圖相連聶氏三禮圖引舊圖云敦受一斗二升漆赤中大夫
饒口以白金案少牢注謂敦飾蓋象龜形蓋者疑辭讀彼疏謂
唯蓋象龜圖從之非鄭情也依鄭孫諸說則敦之形制蓋與
簋相近亦有首有蓋有足又有無足者士喪禮謂之廢敦注云
廢敦無足者是也此玉敦當有足與金敦同金鸞云明堂位有
虞氏之兩敦周之八簋是敦爲虞器周用簋簋亦兼用敦然簋
爲天子諸侯之器而敦則大夫士用之內則言父母之敦牢
非設莫敢用是大夫士常食用敦也士昏禮黍稷四敦皆蓋是
昏禮用敦也少牢饋食禮主婦執一金敦黍又云上佐食取黍
稷于四敦是祭祀用敦也士喪禮朔月奠有黍稷用瓦敦士虞
禮贊設二敦于俎南是喪禮用敦也經典並無天子用敦之文

王府玉敦會盟所用器非祭器也九嬪凡祭祀贊玉盞玉盞者
玉簋簋也鄭注玉盞玉敦誤云珠玉以爲飾者賈疏云此槃敦
應以木爲之將珠玉爲飾耳案賈說是也禮器之敦皆木器而
飾日以金瓦敦則無飾此玉敦蓋亦以木爲之而飾日以玉珠
槃亦以琢玉小珠爲槃口之飾云古者以槃盛血以敦盛食者
牛人祭祀共牛牲并共盆簋先鄭注云盆所以盛血是祭祀盛
血用瓦盆此槃則以木爲之形制蓋與盆相近敦盛食者內則
注云敦黍稷器也九嬪玉盞注亦以爲玉敦與此器同而用
異賈疏云案特牲少牢皆敦盛黍稷以槃盛血雖無文郊血及
血以告殺當以槃盛血也案賈說與牛人不合恐非是鄭意恆
制槃盛血敦盛食盟則以槃承耳敦盛血不與常同也左傳僖

三十三年曹僖負羈饋晉公子榮於則榮亦可以盛食不定以盛血矣云合諸侯者必割牛耳取其血敵之以盟珠槃以盛牛耳者說文欠部云敵敵也國語晉語韋注云敵飲血也此據戎右玉敦辟盟與贊牛耳爲二事明珠槃盛耳不盛血也曲禮孔疏云盟者殺牲歃血誓于神也盟法先鑿地爲方坎殺牲于坎上割牲左耳盛以珠盤又取血盛以玉敦用血爲盟書成乃歃血而讀書云尸盟者執之者明大會同王尸盟卽王自執牛耳也賈疏云尸猶主也小國主盟故使執牛耳也知此珠槃玉敦爲盟而設者案戎右云盟則以玉敦辟盟遂役之替牛耳桃茢彼注云役之者傳敦血授當敵者割牛耳取血助爲之反血在敦中以桃茢拂之是以知珠槃玉敦爲盟而設若然執牛耳是

小國尸盟者也若以敵血則大國在先故哀公十七年吳晉爭先國語曰吳公先歃晉亞之既言爭先是以知大國當在先若諸侯相與盟則大國或有執牛耳也案賈說非也左定八年傳晉師將盟衛侯于鄆澤衛人請執牛耳杜注云盟禮尊者淪牛耳主次盟者衛侯與晉大夫盟自以當淪牛耳故請之又哀十七年傳公會齊侯盟于蒙孟武伯問於高柴曰諸侯盟誰執牛耳季羔曰鄆衛之役吳公子姑曹發陽之役衛石魋武伯曰然則魋也杜注云執牛耳尸盟者鄆衛則大國執發陽則小國執據時執者無常故武伯自以爲可執孔疏云劉炫以爲小國恆執牛耳何得云執者無常黃以周云依禮諸侯相與盟大國執發陽之役吳不盟宋皇瑗又臣魯衛無大小故石魋執杜劉說

胥失之詒讓案以左傳諸文覈之則執牛耳者必尸盟尸盟者必大國其常法也亦有時以小國尸盟則卽以小國執牛耳其變禮也故襄二十七年左傳宋之盟晉楚爭先叔向謂趙孟曰諸侯歸晉之德只非歸其尸盟也且諸侯盟小國固必有尸盟者是小國亦有尸盟之證然則執牛耳必尸盟不分大國小國賈及劉氏規杜並謂執牛耳必小國杜預春秋釋例云盟者殺牲載書大國制其言小國尸其事此卽劉賈諸說所本然與哀十七年傳注不合今攷鄆衍吳盟則公子姑曹執發陽吳不盟則衛石魋執似當以大國執爲正但蒙之盟魯與齊盟齊大於魯何以孟武伯自謂當執牛耳則杜謂執者無常說自可通賈又謂敵血必大國在先尸盟則小國不知先敵卽是尸盟故宋

之盟晉是爭先叔向以非歸其尸盟爲說又戎右贊牛耳亦非
卽執牛耳賈乃云若諸侯相與盟則大國戎右執牛耳此與戎
右職不合又與小國尸盟執牛耳之說自相違伐並非也左傳
定八年孔疏又云盟用牛耳卑者執之尊者涖之衛人請執牛
耳請使晉大夫執牛耳鄆衍吳爲盟主不知盟禮當令小國執
牛耳而自使其臣執之是分執牛耳涖牛耳爲二尤誤云故書
珠爲夷鄭司農云夷槃或爲珠槃者段玉裁云司農從或本作
珠鄭君從之也徐養原云珠夷形聲不同各爲一字凌人共夷
槃水依尸而爲言者也此不應與之同名故不從故書詒讓案
徐鍇本說文岡部說盟禮作朱盤玉敦疑故書或本有作朱者
朱與夷形近與珠聲同故傳寫互異與云玉敦獻血玉器者玉

敦所以承血而傳敵之也春秋釋例云盟者珠槃玉敦以承流血而同敵又史記平原君傳平原君適楚毛遂謂楚王之左右曰取雞狗馬之血來毛遂奉銅盤而跪進之楚王當敵血而定從於殿上據彼二文則槃亦以敵血或通言不別也凡王之獻金玉兵器文織良貨賄之物受而藏之謂百工爲王所作可以獻遺諸侯古者致物於人尊之則曰獻通行曰饋春秋曰齊侯來獻戎捷尊魯也文織畫及繡錦疏凡王之獻金玉兵器文織良貨賄之物受而藏之者並謂臣民獻之於王者王府則受而藏之以備其御也 注云謂百工爲王所作可以獻遺諸侯者鄭以此經云王之獻與內府四方之幣獻文例相似彼幣獻爲四方所進獻則此王獻亦據王所獻遺言之故謂此經金玉兵

器等皆是百工爲王作藏之玉府以備獻遺諸侯者百工則考工記攻金刮摩設色諸工是也云古者致物於人尊之則曰獻者鄭又釋天子遺諸侯物稱獻之義檀弓云仕而未有祿者君有饋焉曰獻鄭彼注云君有饋有饋於君與此注尊之曰獻義同賈疏云若正法上於下曰賜下於上曰獻若尊敬前人雖上於下亦曰獻是以天子於諸侯云獻案月令后妃獻繭鄭注謂獻於后妃知此王之獻金玉非是獻金玉於王者案下內府職凡四方之幣獻之金玉彼是諸侯獻王入內府藏之不得在此故知金玉是獻遺諸侯者也況諸侯中兼有二王之後二王之後王所尊敬自然稱獻也若王肅之義取家語曰吾聞之君取於臣曰取與於臣曰賜臣取於君曰假與於君謂之獻以此推

鄭君鄭君弟子馬昭之等雖王肅禮記曰尸飲五君洗玉爵獻卿況諸侯之中有二王之後何得不云獻也案依王肅說則此經云獻亦爲臣獻於王劉敞易祓黃度林之奇王與之方苞林喬蔭黃以周說並同江永云注謂王用以獻遺諸侯恐不然此謂臣下有獻於王如曲禮所謂大夫私行反必有獻少儀所謂君將適他臣如致金玉貨貝于君是也四方之幣獻則入之內府王引之云獻者獻於王也諸侯獻金玉兵器文織良貨賄之物於王則王府爲王受而藏之若魯僖公納玉於王十穀之類是也若謂王獻諸侯之物則受而藏之者當在諸侯不得在王府矣且何以別於下文凡王之好賜乎內府凡適四方使者共其所受之物而奉之鄭彼注曰王所以遺諸侯者彼注王遺諸

侯之物故曰共曰奉此爲諸侯獻王之物故曰受曰藏不可比
而同之也至內府凡四方之幣獻之金玉齒革兵器凡良貨賄
入焉與此相同所謂官聯也若謂內府所掌玉府不應與之同
則內府掌共王及冢宰之賜予玉府何以亦共王之好賜乎殆
失之矣案江王宗王肅說並通少儀臣致礎於君則曰致廢衣
於賈人彼注引此經爲釋似亦以獻屬臣獻君言之足正此注
之誤云通行曰饋者說文食部云饋餉也廣雅釋詁云饋遺也
饋遺並通行之辭賈疏云言通行者上於下下於上及平敵相
於皆可云饋康子饋藥陽貨饋孔子豚皆是上於下曰饋膳夫
職云王饋用六穀及少牢特牲稱饋食之禮並是於尊者曰饋
朋友之饋雖車馬不拜是平敵相饋故鄭云通行曰饋引春秋

日齊侯來獻戎捷尊魯也者莊三十一年經六月齊侯來獻戎捷左傳云非禮也凡諸侯有四夷之功則獻于王王以警于夷中國則否諸侯不相遺俘杜注云捷獲也獻奉上之辭又釋例云獻者自下奉上之稱遺者敵體相與之辭傳曰諸侯不相遺俘齊侯失辭稱獻失禮遺俘故因其來辭見自卑也以其大卑故書以示過杜例與鄭此注義同賈疏云然三傳皆不解獻義今鄭引者以齊大於魯言來獻明尊之則曰獻未必要卑者於尊乃得言獻云文選書及續錦者月令文選有恒注云文謂畫也說文糸部云織作布帛之總名也又帛部云錦襄邑織文也書禹貢兗州厥篚織文僞孔傳云織文錦綺之屬荀子禮論篇楊注云文織染絲織爲文章也任大椿云鄭分文爲畫織爲錦

繡其實錦織而繡刺繡以大通言之也詒讓案月令注云祭服之制畫衣而縗裳又玉藻士不衣織注云織染絲織之縗大夫以上服皆染絲織之織成文則爲錦織成綬縉而畫之則爲文刺之則爲繡畫兼布帛言之雖屬文亦得爲織繡錦皆帛之有文采者雖屬織亦得爲文故鄭兼釋之凡王之好賜其其貨賄疏凡王之好賜者內饗注云好賜王所善而賜也案好賜與大宰好用內饗好賜予義同賈疏謂王於羣臣有恩好因燕飲而賜之貨賄未析饗大宰內饗疏好用殿九式之末其事較輕而此及內府外府職歲職幣五官通掌之者此及內府具其貨賄外府職歲職幣則共其財用貨賄財用分儲諸官府或此有彼無不能一律故必眾官通共乃能具給也

內府掌受九貢九賦九功之貨賄良兵良器以待邦之大用大
用朝覲之班賜疏享受九貢九賦九功之貨賄良兵良器者賈
疏云此九貢以下而言受卽是大府所云九貢已下頒之於受
藏之府是也案彼注云受藏之府若內府也則此九貢等由大
府而來內府皆受藏之也良兵良器此是冬官百工所作亦由
大府而來良兵謂弓矢殳矛戈戟五兵之良者良器謂車乘及
禮樂器之善者詒讓案九功卽九職貨賄卽九職商賈之貢良
兵良器卽九職百工之貢也其九貢九賦亦有之九貢九賦九
功並詳大宰大府疏 注云大用朝覲之班賜者鄭意此大用
對職幣詔上之小用賜予故亦以班賜爲釋謂若親禮賜侯氏
車服又云重賜無數注云重猶善也所加賜善物多少由恩也

此貨賄良兵良器之等亦所以共重賜也賈疏云掌給九式及
帛用是大府所給也好賜之用玉府所給也此又言以待邦之
大用是朝覲頒賜可知黃以周云內府之大用謂祭祀賓客張
紀會同軍旅之大財用也注專以朝覲之頒賜言似偏案黃說
是也此大用與外府職幣小用相對爲文當通包九式之法用
與大府長屬同共不得強爲區別鄭賈說並未咳凡四方之幣
獻之金玉齒革兵器凡良貨賄入焉諸侯朝聘所獻國珍疏凡
四方之幣獻之金玉齒革兵器者大宰大朝覲會同有玉幣玉
獻之等是朝會之幣獻也聘禮云賓之幣唯馬出其餘皆束注
云馬出當從廢也餘物皆束藏之內府是聘之幣獻也二者蓋
皆藏於內府職方氏注云齒象齒也革犀兕革也詳彼疏云凡

良貨賄入焉者賈疏云其不良者入於職內給國之用此良者
入內府以給王之用 注云諸侯朝聘所獻國珍者國珍謂侯
國所出之珍物大戴禮記朝事篇云奉國地所出重物而獻之
明臣職也是也賈疏云魏禮所云匹馬卓上九馬隨之龜金竹
箭分爲三享是也諸侯遣臣聘所獻國珍者謂若聘禮束帛加
璧庭實黍皮之等是也此因朝聘而貢先入於掌貨賄入其要
於大府乃始通之於內府也案賈謂朝覲庭實有龜金竹箭本
鄭覲禮注說似未塙詳大行人疏凡適四方使者其其所受之
物而奉之王所以遣諸侯者疏凡適四方使者者猶小行人云
使適四方彼注云適之也賈疏云謂使公卿以下聘問諸侯若
大行人所云開問省覲之等云其其所受之物而奉之者此物

亦據貨賄及良兵良器等而言凡使者所當受之物內府則依法式共而奉與之注云王所以遣諸侯者者謂享幣之外別有賜遺者也賈疏謂卽上王之獻金玉兵器等亦襲玉府注之誤凡王及冢宰之好賜予則其之冢宰待四方賓客之小治或有所善亦賜予之疏注云冢宰待四方賓客之小治者據大宰文此卽敘官注云百官摠焉則謂之冢是也云或有所善亦賜予之者說文予部云予推予也好賜予卽內養玉府之好賜也注訓好爲善與內養注義同

外府掌邦布之人出以其百物而待邦之用凡有灋者布泉也布讀爲宣布之布其藏曰泉其行曰布取名於水泉其流行無不備入出謂受之復出之其百物者或作之或買之待頒給也

有法百官之公用也泉始蓋一品周景王鑄大泉而有二品後
數變易不復識本制至漢唯有五銖入行王莽改貨而異作泉
布多至十品今存於民間多者有貨布大泉貨泉貨布長二寸
五分廣寸首長八分有奇廣八分其間好徑二分半足枝長八
分其右文曰貨左文曰布重二十五銖直貨泉二十五大泉徑
一寸二分重十二銖文曰大泉直十五貨泉貨泉徑一寸重五
銖右文曰貨左曰泉直一也疏掌邦布之入出者此官爲九府
之一凡圖法鑄造及賦入之泉布此官總掌其入出之事與泉
府爲官聯也惠士奇謂此邦布卽閭師之夫布亦卽荀子富國
篇所謂刀布之斂又管子輕重甲篇云屋粟邦布今案管子之
邦布卽載師之里布亦泉人之一端也詳載師疏注云布泉

也者載師司市廛人羊人巫馬注並同槽弓注云古者謂錢爲泉布所以通布貨財國語周語韋注云泉者金幣之名古曰泉後轉曰錢云布讀爲宣布之布者段玉裁云凡言讀爲者必易其字此未易其字而曰讀爲何也雖未易其形而易其義也布字泉織爲本義宣布爲引伸之義以布可舒卷而引伸之也鄭恐人疑經謂布匹故舉引伸之義以易本義云其藏曰泉其行曰布者明泉布異名同物以行之曰布故取宣布之義漢書食貨志顏注云布亦錢耳謂之布者言其分布流行也云取名於水泉其流行無不徧者漢書食貨志云貨實於金利於刀流於泉布於布束於帛注引如淳云流行如泉也史記貨殖傳計然曰財幣欲其行如流水云入出謂受之復出之者謂凡納邦布

者皆入於外府其須用者則外府復出之也云共百物者或作之或買之者作之謂出泉市材使官工營作之買之謂直出泉市已成物不須作者及動植諸物皆是也云待進給也者大府注同云有法百官之公用也者此亦注用今字也謂官府之公法言於大宰九式之法者鄭意經云待邦之用凡有濫者與倉人濫用義正同賈疏以待邦之用謂國家非常所用凡有濫者是在朝官府依常法用之強爲分別非鄭情也云泉始蓋一品周景王鑄大泉而有二品者漢書食貨志云太公爲周立九府之法錢園函方輕重以鈔周景王時患錢輕將更鑄大錢單穆公曰不可古者天降災戾於是乎量資幣權輕重以救民民患輕則爲之作重幣以行之於是有母權子而行民皆得焉若不

堪重則多作輕而行之亦不廢重於是乎有子權母而行小大利之今王廢輕而作重民失其資能無困乎王弗聽卒鑄大錢文曰寶貨案國語周語亦載此事在景王二十一年韋注云單穆公曰古者有母平子子權母而行則二品之來自古而然矣鄭君云錢始一品至景王而有二品皆之不熟也案韋說是也云後數變易不復識本制者謂秦及漢初泉法數變易不復識古圖法之本制也云至漢唯有五銖久行者漢食貨志云漢興以爲秦錢重難用更令民鑄莢錢孝文五年乃更鑄四銖錢其文爲半兩武帝更造錢幣令縣官鑄半兩錢更鑄三銖錢重如其文明年有司更請郡國鑄五銖錢案漢初莢錢四銖三銖之屬皆不久卽罷惟五銖終漢世行之故云唯五銖久行云王莽

改貨而異作泉布多至十品者漢食貨志云王莽居攝變漢制以周錢有子母相權於是更造大錢徑寸二分重十二銖文曰大錢五十又造契刀錯刀契刀其環如大錢身形如刀長二寸文曰契刀五百錯刀以黃金錯其文曰一刀直五千與五銖錢凡四品並行莽卽眞以爲書劉字有金刀通罷錯刀契刀及五銖錢而更作金銀龜貝錢布之品名曰寶貨小錢徑六分重一銖文曰小錢直一次七分三銖曰幺錢一十次八分五銖曰幼錢二十次九分七銖曰中錢三十次一寸九銖曰壯錢四十次前大錢五十是爲錢貨六品直各如其文大布次布弟布壯布中布差布厚布幼布幺布小布小布長寸五分重十五銖文曰小布一百自小布以上各相長一分相重一銖文各爲其布名

直各加一百上至大布長二寸四分重一兩而直千錢矣是爲布貨十品是王莽異作泉布多品之事也云今存於民間多有貨布大泉貨泉者言莽亡後所作泉布並廢至鄭君時民間所有者惟此三品爲多也云貨布長二寸五分廣一寸首長八分有奇廣八分其圓好徑二分半足枝長八分其右文曰貨左文曰布重二十五銖直貨泉二十五者漢食貨志云天鳳元年罷大小錢改作貨布長二寸五分廣一寸首長八分有奇廣八分其圓好徑二分半足枝長八分闊廣二分其文右曰貨左曰布重二十五銖直貨泉二十五卽鄭所據也云大泉徑一寸二分重十二銖文曰大泉直十五貨泉者亦據漢志文已詳前宋建陽本無貨泉二字亦通賈疏云案彼大泉直五十不云五十言

十五者亦誤當從五十爲正也詒讓案周語注引此注作文曰
大泉五十與漢志同疑今本挽誤彼注又引唐固說以大泉爲
周景王所鑄亦誤云貨泉徑一寸重五銖右文曰貨左曰泉直
一也者亦天鳳元年所作漢志云貨泉徑一寸重五銖文有曰
貨左曰泉枚直一是也其王及后世子之衣服之用凡祭祀賓
客喪紀會同軍旅其其財用之幣齋賜予之財用齋行道之財
用也聘禮曰問幾月之齋鄭司農云齋或爲資今禮家定齋作
資立謂齋資同耳其字以齊次爲聲從貝變易古字亦多或疏
共王及后世子之衣服之用者謂共泉與司服內司服追師弁
師屨人王府諸官用之也云凡祭祀賓客喪紀會同軍旅其其
財用之幣齋者以下並專屬王之用不爲后世子也亦並共泉

與之賈疏云幣齋之財用謂王使公卿已下聘問諸侯之行道所用則曰幣齋案經云財用之幣齋與下賜予之財用互文疏以文例整齊之則云幣齋之財用凡疏述經注不必盡依元文也此幣卽小行人六幣之等與職幣義異祭祀以下五者所用幣齋蓋諸共王及諸臣行道之用及問勞大小賓客若祭祀有助祭喪紀有弔送會同軍旅則或來會或徵告皆有財幣賈專據聘問言則與經總承上五事者不相應矣云賜予之財用者卽內饗好賜亦卽大宰之好用詳大府疏易祓云此卽上文所謂待邦之用凡有法者也法九式是也共王及后世子衣服之用則大宰羞服之式祭祀賓客喪紀會同軍旅之幣齋賜予之財用則又大宰祭祀賓客喪荒芻秣匪頒好用之式

注云齋

行道之財用也者漢書食貨志云行者齋居者送顏注云齋謂將衣食之具以自隨也廣雅釋言云齋裝也漢書霍去病傳約輕齋顏注云齋字與資同謂資裝也案依鄒巾車注則齋本訓財而此特云行道之財用者以經幣齋與財用連文不當總訓爲財故以行道別之然則此齋猶言持也謂行道所持之財用小宗伯云大賓客受其將幣之齋注云謂所齋來貢獻之財物此幣齋義當與彼同彼爲齋來之物此爲齋去之物凡禮幣及行道辨裝通爲幣齋皆外府所共也通言之齋卽爲財用少儀云君將適他臣如致金玉貨貝於君則曰致馬資於有司彼馬資與此幣齋義亦略同引聘禮曰問幾月之齋者聘禮記記聘使將行之禮云旣受行出遂見宰問幾月之資鄭彼注云資行

用也古者君臣謀密草創未知所之遠近間行用當知多少而已古文資作齋案彼依今文作資此經字與古文同故鄭卽從古文作齋引之也鄭司農云齋或爲資者謂故書或本也不云故書者文略丁晏云掌皮先鄭注齋或爲資與婦功注故書齋爲資杜子春讀爲資與泉注故書齋作資攷工記注故書資作齊杜子春云齊當爲資古齋齊資並通用云今禮家定齋作資者先鄭據聘禮記今文作資與古文異今禮家卽謂禮今文家也云立謂齋資同耳其字以齊次爲聲從貝變易古字亦多或者段玉裁云此司農說禮家定齋當作資而鄭君非之謂二字皆可用齋從貝齊聲資從貝次聲實一字也古字亦多或者謂古字多或體如說文多云某或某字者是也說文貝部資貨也

齋持遺也不云是一字似較鄭君爲長詒讓案齋資兩文杜許並分爲二先鄭則兩列其字不敢決定後鄭則徑合之故全經字並從齋而訓解則兼取許書二義如巾車毀折入齋於職幣鄭不從杜讀爲資而從其資財之訓此與許書音字說解同者也此職幣齋注謂行道之則用小宗伯將幣之齋注謂齋來之財物掌皮歲終則會其財齋注云所給予人以物曰齋稟人掌受財于職金以齋其工注云給市財用之直典婦功以授嬪婦及內人女功之事齋注云謂以女功之事來取絲枲日行道日齋來日給予日來取此並與許書齋字說解持遺之義略同而日財用日財物日絲枲則又兼取資財之義然則後鄭雖合二字爲一不及許之分析而隨文作訓義則二者兼備未嘗偏持

一說矣至考工記總敘或通四方之珍異以資之注云資取也操也此亦與持遺義同依許書正當作齋而鄭顧從資者以彼記故書作齋爲齋之同聲段借字義更不及資之明切故不得不從今書耳凡邦之小用皆受焉皆來受疏凡邦之小用皆受焉者小用蓋共二夫人與諸王子以下之衣服及大宰九式之小者若小司馬云小祭祀會同饗食師田喪紀等諸事之用又大府有王玩好之用皆是對上文共王后世子衣服及祭祀賓客喪紀會同軍旅等財用爲邦之大用也凡大用小用皆爲法用則皆此官共其泉布賈疏謂外府所納泉布所積既少有小用則給之若大用則取餘府失之注云皆來受者謂主用者來取外府給之彼則受也經文云皆受嫌此官受彼故特釋之

歲終則會唯王及后之服不會疏歲終則會者此正邦布之歲會外府之官成也云唯王及后之服不會者膳夫注云不會計多少優尊者是也賈疏云言王及后不會以衣服異於膳羞與所加禽獸故通世子可以會之也

司會掌邦之六典八灋八則之貳以逆邦國都鄙官府之治逆受而鈎考之疏掌邦之六典八灋八則之貳者此執國典之副與小宰大史內史爲官聯也司會總天下會計之成得尊任重凡治官官法之大者並大宰掌其正本此官掌其副貳其職蓋亞於六卿故大戴禮記盛德篇云大官以爲稽司會均人以爲勅又大司寇邦大盟約之盟書司會皆受其貳而藏之則約劑之屬亦其所掌不徒典法則矣互詳大宰小宰疏 注云逆受

而鈎考之者小宰注云逆迎受之又鄭師注云逆猶鈎考也鬼谷子權篇陶弘景注云求其深微曰鈎國語晉語韋注云考核也鈎考亦謂鈎求考核之察其是非也以九貢之灋致邦國之財用以九賦之灋令田野之財用以九功之灋令民職之財用以九式之灋均節邦之財用掌國之官府郊野縣都之百物財用凡在書契版圖者之貳以逆羣吏之治而聽其會計郊國郊去國百里野甸稍也甸去國二百里稍三百里縣四百里都五百里書謂簿書契其最凡也版戶籍也圖土地形象田地廣狹疏以九貢之灋致邦國之財用者以下總掌財用之法與小宰大府爲官聯也賈疏云九貢卽是大宰九貢其所貢之物出於諸侯邦國貢之財用謂諸侯於其民什一取之既取得民物大

國貢半次國三之一小國四之一所貢之物皆市取土毛貢於天子則禹貢所云厥篚厥貢是也故云致邦國之財用此卽小行人云春令入貢是謂歲之常貢大行人因朝而貢者所貢無常不應使司會致之案賈誼邦國之貢據大司徒後鄭注說謂次國貢三之一小國貢四之一義與彼經不合詳彼疏云以九賦之禮令田野之財用者明九賦爲地稅之正法也上九貢出於畿外邦國以其自遠而至故曰致此及下九功並出於畿內以其斂之於近故曰令謂以其書令凡稅斂之吏依法征之也賈疏云此九賦卽大宰所云九賦斂財賄是也言法者謂口率出錢多少有其定法九賦之內惟有關市幣餘國中非田野自外四郊邦甸家稍邦縣邦都山澤盡是田野據多言之故曰令

田野之財用案九賦卽畿內之地稅故經云令田野之財用若如鄭賈說以爲口賦則與經義不相應矣九賦關市幣餘之賦卽出於官府賈後疏謂官府不出賦亦誤並詳大宰疏云以九功之漙令民職之財用者九功與大府內府義同大宰以九職任民而貢其功猶後世之口賦鄭賈謂卽什一之地稅非也詳大宰內府疏云以九式之漙均節邦之財用者與大宰同上三者爲斂入之法此爲頒出之法故云均節詳大宰疏云掌國之官府郊野縣都之百物財用凡在書契版圖者之貳者此與宰夫司土職方氏司民爲官聯也賈疏云案大宰九賦一曰邦中二曰四郊此不言邦中而言官府者以官府在邦中故舉官府以表邦中其實官府不出賦也百物財用者以其民之出賦不

必皆使出泉以百物當之亦得故大宰云九賦敘財賄則此百
物財用一也但九式用九賦大宰均節而用之此司會主鉤考
故亦言之矣此書契版圖下文司書掌其正此司會主鉤考故
掌其副貳曾釗云此經不掌賦蓋謂掌官府郊野縣都之百物
財用之在書契版圖者之貳逆羣吏之治而聽其會計耳不必
謂舉官府以表邦中也當以掌國之官府郊野縣都之百物財
用凡在書契版圖者之貳絕句其言書契謂官府之書契版圖
謂郊野縣都之版圖百物財用謂官府郊野縣都之出入賈賁
讀財用絕句誤矣案曾說是也黃以周說同此經官府蓋通六
官所屬百官府言之郊野縣都則自國城外極於五百里置此
官總攷其會計職掌蓋通於畿內不及國中者言郊以包國中

文不具也百物財用者宰夫注云財泉穀也用貨賄也物畜禽也案百物者小宰六職云政職以聚百物事職以生百物又見外府司書綜校諸文則百物當通咳大司徒五地動物植物及閭師百工所貢器物之等言之宰夫注義殊未咳也百官府及郊野縣都皆有府藏委積廩牧則各有財物存儲及出入故職內有官府都鄙財入之數職歲有官府都鄙財出賜之數凡此財用出入之數則在書契官祿民賦之數則在版田野地產之數則在圖經云在者明官府郊野縣都百物財用之總要咸具於此官府之長郊野縣都之吏各分執其正本此官則通執其副貳以待會計也賈疏乃以此爲專據九賦言之遂謂官府爲邦中之賦百物爲出物以當泉賦其誤甚矣又司書卽司會之

屬官所掌版圖亦卽副貳賈謂彼掌其正亦誤云以逆羣吏之
治而聽其會計者謂據書契版圖等以考吏治之舉廢羣吏與
大宰小宰義同亦通內外百官府言之詳大宰疏賈疏云羣吏
謂朝廷官府下及羣都縣鄙羣臣之治皆逆而鉤考之羣吏以
官計文書送於司會者司會皆聽斷之 注云郊四郊去國百
里者大宰注義同此四郊兼六鄉當通王城以外至百里界言
之賈謂據遠郊言誤云野甸稍也者賈人注同甸師注云郊外
曰野縣士注云距王城二百里以外至三百里曰野是也蓋甸
稍在鄉郊之外縣都之內此及遺人賈人諸職通謂之野縣師
送人縣士經注並以野爲甸稍縣都之通名此文郊野之升別
出縣都故知野不兼縣都也此野當兼六遂公邑家邑言之云

甸去國二百里稍三百里縣四百里都五百里者大宰注義並
同此縣都當通公邑大小都言之云書謂簿書者謂會計之書
著於簿籍者釋名釋書契云笏或曰簿可以簿疏物也案孟子
萬章篇云孔子先簿正祭器趙注亦以簿爲簿書則周時已有
簿書之名賈疏謂舉漢法而言非也互詳敘官及小宰疏云契
其最凡也者小宰注云凡簿書之最目獄訟之要辭皆曰契是
也最凡與最目義同賈疏云此之書契卽小宰八成取予以書
契之類最凡謂計要之多少以爲契要案亦詳小宰疏云版戶
籍也者小宰先鄭注同小司寇司民之民數凡登於天府者司
會皆受其貳卽所謂版也云圖土地形象田地廣狹者據司書
大司徒並云土地之圖形象謂方圓邪正之形田地廣狹謂廣

輪步畝之數並載於圖也以參互攷日成以月要攷月成以歲
會攷歲成參互謂司書之要貳與職內之入職歲之出故書互
爲巨杜子春讀爲參互疏以參互攷日成者此官贊冢宰總掌
六官會計之事與小宰爲官聯亦所謂官成也賈疏云司會鉤
考之官以司書之等相參交互考一日之中計筭文書也黃以
周云日謂十日日成謂旬日之成猶決旬謂之決日也宰夫職
云歲終令正歲會月終令正月要旬終令正日成文義與此相
同則日成爲十日之成可知也云以月要攷月成以歲會攷歲
成者月要歲會卽小宰八成所謂聽出入以要會也賈疏云月
計日要亦與諸職參互考一月成事文書也歲計日會以一歲
之會計考當歲成事文書 注云參互謂司書之要貳與職內

之入職歲之出者賈疏云案司書職云凡稅斂掌事者受法焉
及事成則入要貳焉又案職內云掌邦之賦入又案職歲云掌
邦之賦出云參互鉤考明知有此三官出內事共鉤考之云故
書互爲巨杜子春讀爲參互者脩閭氏云掌比國中宿互陳者
注云故書互爲巨鄭司農云巨當爲互與此義同互巨形聲並
相近故傳寫易譌掌舍杜桓故書桓爲杜杜讀桓爲桓亦其比
例以周知四國之治以詔王及冢宰廢置周猶爾也言四國者
本逆邦國之治亦鉤考以告疏以周知四國之治者以歲成贊
冢宰大計攷天下吏治之舉廢亦所謂官計也云四國者舉外
以包內此官總掌邦計凡邦國官府都鄙鄉遂公邑之治皆其
所通掌也云以詔王及冢宰廢置者大宰云歲終則令百官府

各正其治受其會聽其致事而詔王廢置又八則治都鄙三曰
廢置以取其吏是大宰本以廢置詔王司會既受諸會計官之
歲計而聽之又入之冢宰而以吏事之得失詔王及冢宰以六
官之官計爲其所專司也廢置亦通內外官吏及官長等凡治
脩舉者則進置之怠弛者則黜廢之王制云天子齊戒受諫司
會以歲之成質於天子冢宰齊戒受質大樂正大司寇市三官
以其成從質於天子鄭彼注云歲終羣臣奏歲事市司市也從
從於司會也此卽致歲成詔王及冢宰廢置之事 注云周猶
偏也者大司徒小司徒司稼大祝司陰注並同說文口部云周
密也又夕部云旬而偏也凡經典訓周偏者皆旬之借字廣雅
釋詁云周偏也云言四國者本逆邦國之治亦鈎考以告者賈

疏云案上云掌邦之六典以逆邦國之治逆卽鉤考也方苞云月令每歲季秋制諸侯來歲所賦於民輕重之法貢職之數則古者邦國之要會皆達於天子矣

司書掌邦之六典八瀝八則九職九正九事邦中之版土地之圖以周知入出百物以敘其財受其幣使入于職幣九正謂九賦九貢正稅也九事謂九式變言之者重其職明本而掌之非徒相副貳也敘猶比次也謂鉤考其財幣所給及其餘見爲之簿書故書受爲授鄭司農云授當爲受謂受則幣之簿書也立謂亦受錄其餘幣而爲之簿書使之入於職幣幣物當以時用之久藏將朽蠹疏掌邦之六典八瀝八則九職九正九事邦中之版土地之圖以周知入出百物以敘其財受其幣者此通掌治官官

法官成官計之書及王畿版圖之法以攷會計與小宰天府大司徒大史內史職方氏司民爲官聯也邦中之版者大宰注云邦中在城郭者此官職事通於畿甸則不當止掌王城內民數之版蓋以王城爲官府人民所萃故舉以該百縣又不具也土地之圖者卽職方氏天下之圖此則摭錄內言之賈疏云言掌邦之六典已下至周知入出百物已上所掌與司會同者以其司會主鉤考司書掌書記之司書所記司會鉤考之故二官所掌其事通焉九職卽司會九功也九正卽司會九賦九貢也九事卽司會九式也邦中之版土地之圖卽司會版圖也周知入出百物者卽司會百物財用一也敘請比次其財知用多少云受其幣使人于職幣者賈疏云百官所用餘財送來與司書司

書受其幣使入於職幣之官不入本府案受其幣幣與大宰大府幣餘之賦義同幣鄭讀爲假假卽官府所用之餘也鄭賈並如字釋之非經義詳大宰疏 注云九正謂九賦九貢者賈疏云案上司會有九賦九貢此司書則有九正無九賦九貢故知九正則是九賦九貢也云正稅也者讀正爲征也釋文云九正者征注同案陸音是也司勳先鄭注云正謂稅也司門注云正讀爲征征稅也此不著其讀者文略與司勳注例同九賦爲地稅故掌交謂之九稅征稅義同九貢雖出於邦國亦征於民而共其物故亦通謂之正正征字通詳小宰疏賈讀正如字以謂九賦九貢正稅也爲句謂此二者之財皆出於正稅依其說則正爲正共之義非鄭指也云九事謂九式者賈疏云九式據用

財言之九事據用財所爲之事其理一也云變言之者重其職
明本而掌之非徒相副貳也者賈疏云謂變九賦九貢言九正
變九式言九事也重以其職明本而掌之非徒相副貳也其相
副貳者謂司會六典八法八則之貳是也案鄭賈意蓋謂司書
自掌九正九事之正本不徒如小宰大府職內職歲掌其副貳
故變文以見義也云敘猶比次也者敘注例當作序詳小宰疏
說文敘部云敘次第也敘本爲事有次第之義引申之凡比例
次第亦謂之敘故云猶比次也云謂鈎考其財幣所給及其餘
見爲之簿書者漢書王莽傳顏注云見現在也餘見亦見申屠
嘉傳蓋漢時常語謂百官府所藏財幣除已給用外餘畱見在
若經云敘其財注兼言幣者鄭以受幣爲幣帛也賈疏云司書

周知入出百物以敘其財明知敘其財者所給諸官餘不盡者
卽以餘見爲之簿書擬與司會鈎考之云故書受爲授鄭司農
云授當爲受者授從受得聲故傳寫易誤段玉裁云此從司農
以爲聲之誤而改之也丁晏云典婦功注授當爲受聲之誤也
掌葛注故書受或爲授杜子春云當爲受云謂受財幣之簿書
也者先鄭不知幣當讀爲敝而以爲幣帛故云財幣之簿書其
說非也云立謂亦受錄其餘幣而爲之簿書使之入於職幣者
此從先鄭以授爲受而以幣爲餘幣義長於先鄭云幣物當以
時用之久藏將朽蠹者賈疏云釋經百官餘幣不入於本府而
入於職幣之意若入本府卽是入藏將恐朽爛蠹敗故入職幣
使人占賣之本在生利也詔議案後鄭雖以幣爲餘幣而兼以

幣物爲說義仍未愜凡上之用財用必攷于司會上謂王與冢
宰王雖不會亦當知多少而闕之司會以九式均節邦之財用
疏凡上之用財用必攷于司會者王引之云經兩用字樓出文
不成義下用字蓋因注而衍賈疏云此經上之用財用必攷于司
會者又云司會以九式均節邦之財用者據此則注文作財用
經文則作用財不得云用財用也唐石經始誤衍案王說是也
此用字疑卽下經民之財用之稅文誤移著此者司書爲司會
之屬故凡財用之出必就司會攷而書之以備要貳也 注云
上謂王與冢宰者以冢宰爲天官之正司書卽冢宰之屬故亦
謂之上也賈疏云案內府職云凡王及冢宰賦與則共之明此
上中有冢宰可知云王雖不會亦當知多少而闕之者明王之

用財亦在司書司會所攷之列但爲簿書時關其數示不爲限制耳賈疏云案上膳夫庖人及外府等皆言王及后不會此經上之用財必考於司會者此之所考但知多少而關之非是會計與王爲限云司會以九式均節邦之財用者據司會文以司會爲計官之長司書乃其屬故必考於彼也二歲則大計羣吏之治以知民之財器械之數以知田野夫家六畜之數以知山林川澤之數以逆羣吏之徵令械猶兵也逆受而鉤考之山林川澤童枯則不稅疏三歲則大計羣吏之治者亦贊大宰治官計也大計者通計畿內百官府之吏察其政治得失羣吏與大宰小宰司會義同詳大宰疏云以知民之財器械之數以知田野夫家六畜之數者王引之云賈疏釋經曰以知民之財用器

械之數者民之財用謂幣帛多少則所據經文財下有用字則用器械相對爲文與田野夫家六畜山林川澤文義乃相稱也唐石經始脫用字案王說是也民之財用謂家有恒產稽其貧富器若鄉師輩輩鄉器遂大夫稼器械謂兵甲旗物田野可食之士夫家可任之民六畜則馬牛之等凡案比所及者皆總攷其數也此案比任土任民財用百物之數卽小司徒之比法三年大比與大計事相因也州長云三年大比則大攷州里以贊鄉大夫廢興縣師云三年大比則以攷羣吏而以詔廢置彼因大比而察吏與此因大計而知任土任民之數事同蓋田野之蕪闕戶口之息耗咸與吏治之舉廢相通故大計與大比皆三年一舉而其條法簿要互相出入亦與小司徒鄉大夫縣師爲

官職也云以知山林川澤之數者此虞衡所掌任土任民之餘亦比法之所及也賈疏云案大司徒地有十等不言丘陵墳衍原隰者略言之也云以逆羣吏之徵令者徵令謂宣布法令通該徵役徵賦二義詳宰夫疏賈疏云逆謂鉤考也此司書知民之財器已下川澤已上恐其羣吏濫徵斂萬民故知此本數乃鉤考其徵令也 注云械猶兵也者明經言器械猶王府內府云兵器也說文吸部云兵械也本部云械一曰器之總名也少儀不度民械注云械兵器也公羊莊二十二年傳俄而牙殺械成何注云有攻守之器曰械是械器義同析言之則凡師田攻守甲兵之屬通名爲械也云逆受而鉤考之者司會注同云山林川澤童枯則不稅者釋名釋長幼云山無草木曰童賈疏云

山林不茂爲童川澤無水爲枯所稅者稅其有今山林不茂則
無材木川澤無水則無魚鼈蒲葦故不稅之凡稅斂掌事者受
灋焉及事成則入要貳焉法猶數也應當稅者之數成猶畢也
疏凡稅斂掌事者受灋焉者稅斂通任地任民之征賦言之法
卽前九職九正之法掌斂事之官並於此官受法數依而斂之
也掌事謂地治之吏及執事凡專司徵斂者皆是賈疏謂若地
官閭師旅師諸徵斂之官今攷凡征賦國中四郊閭師斂之鄉
遂鄉師遂師與閭師同斂之公邑縣師斂之旅師唯斂三粟則
非稅斂之正也賈說未謬云及事成則入要貳焉者此稅斂之
官成也事畢則有成卽司會所謂日成月成歲成各官皆爲要
會其正本入大宰副本則入司書也賈疏云及事成收斂畢入

要謂寫一通副貳文書名爲要入司書必來受法又入要貳者以司書知財器已下之數擬後鈎考之也 注云法猶數也者此亦注用今字也法訓數者引申之義管子七法篇云尺寸也繩墨也規矩也衡石也斗斛也角量也謂之法是凡會計等數並謂之法也云應當稅者之數者賈疏云卽上田野夫家之等是其本出稅者之數也云成猶畢也者說文戊部云成就也引申爲凡事終畢之稱士喪禮獻素獻成注云飾治畢爲成亦其義也凡邦治攷焉考其法於司書疏凡邦治考焉者謂政治有疑互辨認不決者皆就此官攷之賈疏謂吏治之善惡非也 注云考其法於司書者經作攷注作考亦經用古字注用今字也邦治有成法皆藏於司書故還就考之也

職內掌邦之賦入辨其財用之物而執其總以貳官府都鄙之財入之數以逆邦國之賦用辨財用之物處之使種類相從總謂簿書之種別與大凡官府之有財入若關市之屬疏掌邦之賦入者此計官財入之官成也賈疏云謂九職九貢九賦之稅入皆掌之獨云賦入者賦是摠名下言賦者皆此類也云辨其財用之物而執其總者此官唯主百官府財入之凡總其受藏則各自有職之者但辨使各從其類耳不必皆入於職內之府也云以貳官府都鄙之財入之數以逆邦國之賦用者此及職歲職幣三職並云官府都鄙之財卽司會所云掌國之官府郊野縣都之百物財用也舉官府都鄙以通包郊野縣等明其無不掌也賈疏云都鄙謂三等采地采地之稅四之一言貳者謂

職內受取一通副貳文書擬鈎考以逆邦之賦用者職內既知財入之數鈎考用賦多少知其得失案賈謂采地之稅四之一入王者據小司徒注義其說未塙詳小司徒疏 注云辨財用之物處之使種類相從者敘官注云辨別也謂分別其賦入之財物自以種類相從而藏之賈疏云但賦之所入先由職內始至大府大府分致於眾府以是分別使眾類相從案賈說非也此官雖自有府藏然唯掌會計不掌徵斂故總辨百官府之財用亦仍就各職當官之府分別存儲蓋職內職歲通掌財之出入亦止執其凡總財入不必皆由職內受入大府財出亦不必皆由職歲受大府而出之故經於職幣有斂幣振財之文而此及職歲兩職則無之足以明之矣云總謂簿書之種別與大凡

者種別請名物之總目大凡謂多少之都數也凡單物出入細目則以種類分別書之又宰輟其都數一者並總爲簿書說文糸部云總聚束也淮南子本經訓高注云總凡也云官府之有財入若關市之屬者賈疏云司關司市皆屬地官關市皆有出稅故知官府之有財入若關市也言之屬者兼有城十二門亦有稅入案百官府又有幣餘之入賈說未該凡受財者受其貳令而書之受財受於職內以給公用者貳令者謂若今御史所寫下本奏王所可者書之若言某月某日某甲詔書出某物若干給某官某事

疏凡受財者受其貳令而書之者賈疏云其有官府合用官物而受財者並副寫一通勅令文書與職內然後職內依數付之又云若然職內主入職歲主出職內分置於眾

府所以得有物出與入者職內雖分置眾府職內亦有府貨賄
留之者故得出給故大府職云願其賄於受用之府鄭注云受
用之府若職內是也案賈說非也此官唯掌書貳令不必自出
給財物詳後 注云受財受於職內以給公用者者鄭意職內
掌財用之物凡受財者卽向職內受之知給公用者別於賜予
爲私用非職內所給然諸審經義實不如鄭說蓋此受財者卽
謂以上令受財於百官府如受泉者卽自向外府泉府取之但
以令送致此官書其副貳以備鈎考非必皆此官取百官府之
財以授之也云貳令者謂若今御史所寫下本奏王所可者者
鄭舉漢制爲況也續漢書百官志云侍御史十五人六百石掌
察舉非法受公卿羣吏奏事有違失舉劾之是漢時御史掌受

章奏凡臣下上書上可其請御史蓋寫其本爲副貳與此職書貳令事相類鄭云若今御史明此御史自是漢官而云王所可者順文便也賈疏不察乃據春官御史職云掌贊書是其用官財者先奏白王王許可則御史贊王爲辭下職內職內則書之爲本案然後給物與之依其說則鄭不當言今失之遠矣又案依鄭義推之則此貳令當爲王及冢宰所下之令其正令下所出財用之府而別以貳令下職內使書之此並據國之大用及非常之頒賜言之若尋常小用自有式法不必有專令也云書之若言某月某日某甲詔書出某物若干給某官某事者丁晏云獨斷云詔書羣臣有所奏請尙書令奏之下有制天子答之曰可若下某官云云亦曰詔書又奏左方下附曰某官臣某甲

上駁議曰某官某甲議其合於上意者又報曰某官某甲議可
詒議案此亦約漢制爲說某甲謂日辰與獨斷某甲謂人姓名
異詳馮相氏疏某事謂因某事而給財說文敘後云十月十九
日申黃門饒喜以詔書賜召陵公乘許冲布四十匹卽日受詔
朱雀掖門敕勿謝此漢時書臣下受賜物之例職內書公用蓋
亦類此及會以逆職歲與官府財用之出亦參互鈎考之疏及
會以逆職歲與官府財用之出者卽以所執財用之總與所書
之貳令以及歲會贊司會而與職歲職幣共校計之也賈疏云
言會者謂至歲終會計以逆職歲者逆謂鈎考也職歲主出職
內主入以已之入財之數鈎考職歲出財之數又云與官府財
用之出者謂職歲出財與官府所用之數並鈎考之注云亦

參互鉤考之者亦訓逆爲鉤考與司會司書注義同賈疏云按司會以參互考之鄭彼注云參互謂司書之要貳職內之入職歲之出以三官相鉤考此職內逆職歲明兼有司書之要貳故言參互言亦者亦如大府也而敘其財以待邦之移用亦鉤考今藏中餘見爲之簿移用謂轉運給他疏而敘其財以待邦之移用者此鉤考幣餘之財與職幣爲官聯也注云亦鉤考今藏中餘見爲之簿者亦冢上司書云以敘其財明其文義同也但此承上官府財用爲文則職內雖是有府藏而其所比次鉤考爲之簿者則廣該取有府藏官而言賈疏謂此敘財亦謂比次職內藏中餘見爲簿書以待邦之移用若然職內既非常府其所藏者唯當歲所用故用不盡者移用之非經注義也云移

用謂轉運給他者說文定部云迻遷徙也移卽迻之段字廣雅釋詁云移轉也謂當官有餘財更轉運給他官之用遣人掌邦之委積以待施惠注云委積者廩人食人計九穀之數足國用以其餘共之所謂餘法用也職內邦之移用亦如此也彼遣人之委積亦儲餘財移給他用足以相況也

職歲掌邦之賦出以貳官府都鄙之財出賜之數以待會計而攷之以貳者亦如職內書其貳令而編存之疏掌邦之賦出者此計官財出之官成也此官亦唯主百官府財出之凡總其出給各自有職之者不必職歲自取給之也賈疏云職內主入職歲主出職內所入於眾府所用之多少皆主之故云掌邦之賦出但九貢九賦九功之用皆主之特言賦者亦如職內云眾賦

是總稱也云以貳官府都鄙之財出賜之數者賜卽下云凡上之賜予是也賈疏云職內云以貳官府都鄙之財入之數此職歲亦貳官府都鄙之財出賜之數二官一入一出皆書其貳共相鉤考故職內云以逆邦國之賦用此職歲云以待會計而考之其事通也 注云以貳者亦如職內書其貳令而編存之者說文糸部云編次簡也賈疏云職內云凡受財者受其貳令而書之此官主出所出亦皆由上令所出前後不同亦皆書其貳令編存爲案以待會計而考之也凡官府都鄙羣吏之出財用受式灋于職歲百官之公用式法多少職歲掌出之舊用事存焉疏注云百官之公用式法多少職歲掌出之舊用事存焉者此亦注用今字作法也百官公用卽外府邦用有法者式法卽

授之者此與職幣爲官職也王及冢宰凡賜予之用當以幣餘之財給之則是出於職幣之府以此官掌財出之數故兼施其事二官同授之且攷其會計也賜予謂好賜亦卽大宰九式好用之式也晏子春秋諫上篇云景公燕賞於國內萬鍾者三千鍾者五令三出而職計莫之從職計蓋卽此職歲職幣之屬注云敘受賜者之尊卑者敘注例當作序此與小宰六敘義同謂若數人同受賜則各依其秩次尊者先授卑者後授職歲與

職幣同敘之也及會以式灋贊逆會助司會鉤考羣吏之計疏
注云助司會鉤考羣吏之計者此贊司會而與職內職幣共攷
會計之書也州長注云贊助也司會注云逆受而鉤考之賈疏
云案司會以逆羣吏之治而聽其會計此官主式灋出財用至
歲終會計之時則以式法贊助司會鉤考會計之事職幣掌式
灋以斂官府都鄙與凡用邦財者之幣幣謂給公用之餘凡用
邦財者謂軍旅疏掌式灋以斂官府都鄙與凡用邦財者之幣
者此官掌大宰九職幣餘之賦亦依式灋校計其財用有贏餘
者而斂之注云幣謂給公用之餘者幣讀爲敝敝餘也詳大
宰疏給公用之餘謂九式所用之餘也故還以式法斂之云凡
用邦財者謂軍旅者以其在官府都鄙之外也惠士奇謂邦財

者外府凡祭祀賓客喪紀會同軍旅財用之幣齎皆是也案惠
說近是凡者辜較之辭蓋通關諸法用而言鄭謂專指軍旅似
未暇振掌事者之餘財振猶拊也檢也掌事謂以王命有所作
爲升言斂幣後言振財互之疏注云振猶拊也檢也者檢舊本
作檢今據宋建陽本注疏本正說文手部云檢拱也非此義王
念孫云經言斂言振注言拊言檢皆謂收取之也中庸振河海
而不泄鄭注曰振猶收也張揖注上林賦同孟子萬章篇曰金
聲而玉振之也廣雅曰收斂拊取也又拊收也孟子梁惠王篇
狗彘食人食而不知檢趙岐注曰檢斂也漢書食貨志贊引孟
子作不知斂斂亦收也振拊檢斂四字同義故曰振猶拊也檢
也賈不曉振字之義又不曉拊字檢字之義乃云以財與之謂

之折此誤以折爲折濟之折知其足剩謂之檢此誤以檢爲檢察之檢案王說是也云掌事謂以王命有所作爲者賈疏云以其上經官府已下是其國家常事此別言掌事是王命有所作爲詔讓案大府云凡官府都鄙之吏及執事者受財用焉此掌事餘財卽吏及執事者所受財用之餘也惠士奇云巾車之毀折入其賈泉府之賈貨納其餘是爲掌事者之餘財案惠說亦注義所駭云先言斂幣後言振財互之者互之猶庭氏注云互言之王念孫云上言斂幣而不言振財下言振財而不言斂幣者言幣則兼財言財則兼幣互文耳故云先言斂幣後言振財互之賈誤以振爲振濟之振又云今於上文直言斂不言振亦振之下言振財有餘亦斂之可知故言互之也此不得其解而

強爲之辭案王說亦是也皆辨其物而奠其錄以書楊之以詔
上之小用賜予奠定也故書錄爲祿杜子春云祿當爲錄定其
錄籍鄭司農云楊之若今時爲書以著其幣疏皆辨其物而奠
其錄者此計官餘財之官成也賈疏云上經既敘得幣皆當辨
其物知其色類及善惡而奠其錄者謂定其所錄簿言色別各
入一府云以書楊之者賈疏云謂府別各爲一牌書知善惡價
數多少謂之楊云以詔上之小用賜予者內府云以待邦之大
用注云大用朝覲之班賜彼注以頒賜釋大用疑鄭意此賜予
亦卽小用矣今攷外府云共賜予之財用又云凡邦之小用皆
受焉是賜予與小用自是二事小用法用之小者猶魯人云餘
法用蓋大用小用皆不出大等九式之外但以事分大小遂有

差別耳幣餘爲羨餘之財故以共小用又大府云幣餘之賦以
待賜予故此亦以詔賜予也賈疏云詔猶告也職幣旣知府內
則告上之王與冢宰小用賜予之事此謂常賜予玉府所云凡
王之好賜共其貨賄及內府云凡王冢宰之好賜此二者非常
賜予外府及典絲枲三官言賜予者與此職幣同亦是國家常
賜予案賈說非也此賜予亦謂好賜與常賜予異又案大府云
凡式貢之餘財以共玩好之用彼亦據幣餘之財而言則此小
用內當亦兼有玩好之用矣並詳大宰及大府疏 注云奠定
也者司市小史弓人注並云奠讀爲定是奠定聲近義亦通也
云故書錄爲祿杜子春云祿當爲錄者祿錄聲類同亦通作祿
周書王會篇云堂下之東面郭叔掌爲天子萊幣焉孔注云萊

條諸侯之幣也彼幣爲幣帛與此異而錄義與此同云定其錄籍者杜亦訓奠爲定也廣雅釋詁云錄具也說文竹部云籍簿也凡財物之名數具於簿籍故通謂之錄奠其錄謂次第財幣名物善惡多少記錄定著於簿籍也鄭司農云揭之若今時爲書以著其幣者職金云辨其物之燬惡與其數量揭而璽之先鄭注云揭書其數量以著其物也國語晉語韋注云著附也案揭者概代也此云以書揭之猶典婦功云物書而揭之泉府云物揭而書之並謂書其名數於牒以爲表識而附著之其物之側也揭詳泉府職金疏歲終則會其出疏歲終則會其出者此正幣餘之歲會職幣之官成也賈疏云以其職幣主出故歲終與司會會之下贊之亦謂贊司會之會事也凡邦之會事以式

還贊之

周禮正義

禮十二

四六

楚學社本

周禮正義卷十二終